



CONSULTA PREALABLA SUS ERA APROBACION DERA MODIFICACION D'UA ORDENANÇA:

Nòm provisionau dera nòrma:

ORDENANÇA REGULADORA DERA GESTION DE RESIDUS URBANS DERA VAL D'ARAN

Antecedents dera nòrma:

Eth miei ambient ei ua matèria transversau que traùesse es diuèrsi sectors dera activitat administrativa. Per aguesta rason, en títol XX deth Tractat dera Union Europèa, que tracte sus eth miei ambient, estipule entre d'autes qu'era politica dera UE aurà de contribusir entre d'auti objectius ara conservacion, era proteccion e era melhora de qualitat deth miei ambient, ara proteccion des persones e ar usatge prudent e racionau des recorsi naturaus. Atau madeish, en art. 191, s'establís qu'es politiques dera UE s'auràn de basar entre d'auti principis en deth "qui contamine pague".

Eth caractèr transversau dera politica ambientau s'explique per hèt qu'en madeish article 3 deth Tractat, a on se fixen es finalitats dera Comunitat Europèa, i figure eth deth creishement economic equilibrat e ena estabilitat de prètzi damb un nivèu elevat de proteccion e melhora de qualitat deth miei ambient.

Atau, era Directiva 2008/98 dera Comission Europèa, Marc de Residus, mèrque coma objectiu un minim deth 55% en pes dera preparacion entara reutilitzacion e en reciclatge de residus entar an 2025. Aguest valor ascendís enquiath 60% entar an 2030 e ath 65% en an 2035. A mès, obligue as Estats membres a hèr usatge d'esturments economics entà promòir eth principi de jerarquia en tot enumerar diuèrsi exemples d'esturments economics, entre es quaus i an:

1. es taxes e restriccions as operacions de dipòsit en tarcumèrs e incineracion de residus qu'incentiven era prevencion e eth reciclatge de residus;
2. es sistèmes de pagament per generacion de residus (pay-as-you-throw) qu'impausen taxes as productors de residus segontes era quantitat reau de residus generadi e proporcionen incentius entara separacion ena origina des residus reciclables e entara reduccion des residus barrejadi;

Aguesta concepcion globalizadora des estats membres a, en definitiva, a toti es poders publics -ens locals includidi- subjèctes ath mandat constitucional de velhar pera utilizacion racionau de toti es recorsi naturaus, damb era finalitat de protegir e melhorar era qualitat dera vida e deféner e restaurar eth miei ambient e complir damb es objectius fixadi en matèria de reutilizacion e reciclatge.



En estat Espanhòl, aquest precèpte se traduís damb era Lei 7/2022, de 8 d'abriu, de residus e solèrs contaminants entà ua economia circulara, que cèrque redusir ath minim es efèctes negatius dera generacion e gestion de residus ena salut umana e en miei ambient, en tot híger coma concèptes principaus era economia circulara e era luta contra eth cambi climatic.

Per aguesta rason, eth concèpte de miei ambient a un caractèr transversau, atau coma ac demòstre eth considerable nombre d'ordenances locals de contiengut ambientau o vinculades ara proteccion deth miei.

Aguest hèt de transversalitat e proteccion ambientau ei especiaument relevant en un territòri coma era Val d'Aran, a on era sua economia, tradicion e cultura son fòrtament ligades ath miei ambient.

Eth Conselh Generau d'Aran a realizat pendent aguesti ans es següentes accions damb era volentat de dar compliment a çò que dispausen es disparières normatives a compdar der an 2025:

1. Elaboracion e redaccion d'un estudi tecnic entara determinacion deth modèl de remassada de residus optim.
2. Licitacion contracte mixte de "Gestion integrau dera remassada e evacuacion de residus dera Val d'Aran, servici de redaccion deth projècte executiu e execucion des òbres d'adeqüacion deth centre de transferéncia de residus". Eth Plen deth Conselh Generau d'Aran a adjudicat definitivament en session plenària de data 26 d'agost de 2024.

Atau madeish ei previst que pendent aguest 2024, eth Conselh Generau d'Aran modifique era ordenança fiscau reguladora dera taxa de remassada de lordères.

PROBLÈMES QUE SE PRETENEN SOLUCIONAR DAMB ERA APROBACION D'AGUEST REGLAMENT.

Era actuau ordenança de gestion de residus urbans dera Val d'Aran que se preten modificar ei publicada en BOP num. 30 de 12 de hereuèr e 2019, e siguec aprovada peth Plen deth Conselh Generau d'Aran de 17 de deseme de 2018.

Aguesta ordenança non auie en compde es requeriments dera Lei 7/2022, de 8 d'abriu, e per tant cau adaptar aguesta ordenança as requeriments qu'en aguest còs legau se dispausen.

Atau madeish era volentat d'aprovar aguesta ordenança a coma objectiu incrementar eth nivèu de reciclatge ena remassada de residus entà dar compliment ara Directiva europèa e ara madeisha Lei 7/2022 de residus.

Tanben ei de besonh adaptar era ordenança tà poder dar compliment as requeriments que s'an establits ena licitacion deth nau contracte mixte de "Gestion integrau dera



remassada e evacuacion de residus dera Val d'Aran, servici de redaccion deth projècte executiu e execucion des òbres d'adeqüacion deth centre de transferéncia de residus.

Qu'eth sistèma de pagament sigue en foncion dera quantitat de residu que se genèr, çò que compòrte un sistèma de remassada que permete identificar guaire e qui genèr residus.

BESONH E OPORTUNITAT DERA SUA APROBACION.

Era Lei 39/2015, d'1 d'octobre, deth Procediment Administratiu Comun des Administracions Publiques e era Lei 40/2015, d'1 d'octobre, de Regim Juridic deth Sector Public, a mès d'enfortir era participacion des ciutadans ena elaboracion des nòrmes, impause, laguens deth procediment d'elaboracion de normativa, era avaloracion "ex-pòst" des nòrmes, en tot impausar era obligacion dera avaloracion periodica damb era fin de comprovar eth compliment des objectius que se perseguissen e era adequacion as objectius actuaus.

Dempús de mès de 5 ans des dera sua darrèra modificacion, damb es naues normatives aprovades a nivèu comunitari e nacionau, damb era naua licitacion deth contracte de gestion integrau dera remassada e evacuacion de residus, hèn de besonh era adaptacion dera ordenança, entà amiar a terme un servici de recuelhuda mès eficient e eficaç que permete incrementar eth percentatge de reciclatge e qu'ath còp permete sistèmes de pagament "pay as you throw".

OBJECTIUS D'ORDENANÇA.

- Poder dar compliment as objectius d'increment de percentatge de reciclatge en tot arténher un minim deth 55% en pes dera preparacion entara reutilitzacion e en reciclatge de residus entar an 2025 e poder arribar ath 65% en 2035.

POSSIBLES SOLUCIONS ALTERNATIVES REGULADORES E NON REGULADORES

Non se contemplen autes possibles solucions alternatives reguladores que non siguen era modificacion dera ordenança de gestion de residus urbans dera Val d'Aran que se prepausa e era modificacion dera ordenança de gestion des deishalheries.

DATA FIN DERA CONSULTA PUBLICA

15 dies naturaus a compdar dera publicacion dera consulta ena sedença eletronica deth Conselh Generau d'Aran.